

**Pemimpin, rakyat bangga Tuanku Abdul Halim ditabal  
Utusan Online  
12 April, 2012**

ALOR SETAR 11 April - Pemimpin dan rakyat negeri ini berbangga dengan pertabalan Sultan Kedah, Tuanku Abdul Halim Mu'adzam Shah sebagai Yang di-Pertuan Agong XIV apatah lagi Seri Paduka mencatat sejarah ditabalkan buat kali kedua dalam sistem pemerintahan Raja Berperlembagaan di negara ini.

Mereka turut berasa amat bertuah kerana mempunyai Seri Paduka sebagai pemerintah negara ini yang dilihat bakal menjadi pemangkin kepada kemajuan dan kemakmuran Kedah ke tahap lebih tinggi.

Pengerusi Barisan Nasional (BN) negeri, Datuk Ahmad Bashah Md. Hanipah berkata, rakyat Kedah pasti paling berbangga apabila Sultan Kedah yang sentiasa mengambil berat terhadap hal ehwal pentadbiran dan kebajikan rakyat jelata ditabalkan sebagai Yang di-Pertuan Agong XIV pada istiadat hari ini.

Beliau yakin Malaysia akan terus makmur dan maju di bawah naungan Tuanku Abdul Halim yang berpengalaman menjadi Yang di-Pertuan Agong V pada 1970 selain sebagai ketua pemerintah di Kedah selama lebih 50 tahun.

"Segenap lapisan rakyat khususnya di Kedah dan Malaysia amnya semestinya meraikan pertabalan ini dengan rasa bangga dan syukur," katanya kepada *Utusan Malaysia* di sini hari ini.

Setiausaha Badan Perhubungan UMNO Kedah, Datuk Othman Aziz berkata, Tuanku Abdul Halim pasti dapat menjalankan tugas sebagai Ketua Negara dengan baik dan mampu menjadi inspirasi rakyat menerusi perwatakan baginda yang berhemah tinggi, bersopan santun serta mempunyai nilai-nilai pekerti tinggi.

"Minat mendalam Tuanku Abdul Halim terhadap bidang sukan juga diyakini akan menjadi penggerak kepada pembangunan sukan negara ke tahap yang lebih tinggi," katanya.

Bendahari Kehormat Majlis Belia Kedah, Shaharol Niza Omar berkata, Tuanku Abdul Halim menjadi inspirasi kepada golongan belia menerusi corak kepimpinan mantap dan penglibatan aktif baginda dalam sukan.

Katanya, golongan berkenaan juga seharusnya menghargai sistem pemerintahan Raja Berperlembagaan di negara yang begitu unik dengan pertabalan Seri Paduka sebagai ketua pemerintah kepada semua lapisan kaum.

"Sistem ini mesti dipertahankan dengan apa cara sekali pun daripada diganggu gugat oleh pihak-pihak tertentu yang mempunyai kepentingan peribadi," katanya.

Seorang guru, Zul Ahmad Tarmizi Hussain, 40, pula menyifatkan rakyat amat bertuah apabila dapat menyaksikan Tuanku Abdul Halim ditabalkan buat kali kedua sebagai Yang di-Pertuan Agong.

"Seri Paduka seorang Sultan berjiwa rakyat. Baginda pasti menjadi ketua pemerintah negara yang dikasihi dan disegani seluruh rakyat," katanya.

Source:

[http://www.utusan.com.my/utusan/info.asp?y=2012&dt=0412&pub=Utusan\\_Malaysia&sec=Dalam\\_Negeri&pg=dn\\_02.htm](http://www.utusan.com.my/utusan/info.asp?y=2012&dt=0412&pub=Utusan_Malaysia&sec=Dalam_Negeri&pg=dn_02.htm)